

僊居集

地

25387

33

僊居集卷一目錄

文外編一 制誥十一首

宋 吳芾徽猷閣直學士知臨安府制 隆興年 洪适  
宋四六文選

明 張槩封刑部主事敕 正德年 康熙鄭志下並同

吳廉禮部給事中敕 正德年

蔣祿贈工部主事敕

諭祭左副都御史李一瀚文 嘉靖年 應氏譜下同

光祿夫大刑部尚書應大猷誥 嘉靖年 應氏譜下同

應大猷存問敕二 隆慶年 萬曆年

諭祭應大猷文 萬曆年

光緒僊居集 卷之一 目錄

左都御史吳時來贈諡誥 萬曆年 鄭志

諭祭左都御史吳時來文 鄭志

文外編二 書啟十七首

宋 與吳察院芾 王十朋 王忠文公集

通吳給事啟 樓鑰 攻媿集

代回仙居楊縣丞啟 陳耆卿 篔簹集

明 蒼黃宗賢應原忠論去私存理書 王守仁 陽明文鈔

蒼應容菴五首 金賁亨 一所集

與應容菴 張時徹 芝園集

與李景山參議 趙大佑 趙大司馬集下同

再簡吳悟齋掌科 趙大佑

與吳悟齋節推 徐階 少湖文集

復吳悟齋操江 海瑞 剛峯集

與吳悟齋操臺 周怡 訥溪文錄

國朝 懇釋回難民子女啟 鄭錄勳 鄭志下同

亟請添兵防禦并陳進剿機宜密啟 鄭錄勳

光緒僊居集

卷之一 目錄

僊居集卷一

文外編一 制誥

宋

吳芾徽猷閣直學士知臨安府制

隆興年

洪

适

字景伯  
鄱陽人

京師蓋浩穰之地輦轂以彈壓為先威不振則盜賊公行政之成則紀綱具舉必濟寬之有術斯救弊而無偏我得賢能使之尹正具官某材見實用學非空言頃違表著之班疊佩蕃宣之寄發擿隱伏雖銖兩之姦皆知撫字困窮無尺寸之膚不愛復入文部一清武銓會天府之闕人稽輿言而出命顧覆車之當戒期奠枕而相安前有趙而後三王遺風可想昔無襦而今五

光緒僊居集

卷之一

文外編

制誥

一

袴惠露是宣用副選掄兼思幹治

明

張概封刑部主事敕

正德十四年七月二十日

家丕懿謀由來賴善承之子朝隆鉅典所以作願忠之臣覩茲  
廷訊之得乎追維淵源之有自爾原任廣東惠安縣儒學教諭  
張槩乃南京刑部貴州清吏司主事張儉之父起家經學捧簡  
策而對大廷筮仕儒林咏薪樵而造南國後人之軌範克昭文  
章登甲儒者之義方不替忠恕明刑茲特封爾爲主事絳帳風  
寒夙宣勞於教鐸白雲氣肅茲膺秩於秋曹用廣錫類之恩益  
厲敬同之節永享遐齡肅膺休命

吳廉禮科給事中敕

正德十五年閏八月二十七日

光緒僊居集

卷之一

文外編 制誥

二

國家董齊庶政分建六科名應部曹實與盈庭之議職專糾劾  
亦均治事之勞國體是關公論攸託匪兼才行曷稱簡求爾禮  
科給事中吳廉人稱偉品天賦粹資擢高第於彤廷列華班於  
青瑣建明國是志每切於輸忠糾正官非心實嚴於嫉惡閱歷  
滋深操持益茂最考方書渥恩斯布非獨示賢勞之勸益以著  
簡拔之懷茲特進階錫之敕命於戲論列必先大而後小官守  
當謹始而戒終佇觀來效光我命詞

蔣祿贈工部主事敕

禮重兩宮載舉尊親之典恩均百辟仍推錫類之仁顧世宦之  
相承見慶源之有自寵褻所賁存歿何殊爾原任福建泉州府

安溪縣知縣蔣祿乃工部都水清吏司主事蔣泮之父賦質純誠持身廉慎學攻儒業名列賢關化孝敬於一門家存遺範稱循良於二邑民有去思志未究其所施慶乃鍾於厥嗣甲科登第允稱俊乂之才郎署列官茂著賢能之譽信家聲之益振揆庭訓爲可徵爰錫寵章用昭潛德茲特贈爲承德郎工部都水清吏司主事是父是子永增繼述之光惟孝惟忠益勵顯揚之美

諭祭左副都御史李一瀚文

隆慶三年十二月初四日

惟爾性資剛毅操守清嚴奮迹甲科筮官民牧擢司臺憲克著風裁洵歷臬藩益持法紀爰遷留尹遂陟中丞方以疾聞遽茲

光緒僊居集

卷之一

文外編 制誥

三

訃至往勞爾念卹典聿頒營葬飭工命官諭祭爾靈不昧尚克欽承

光祿大夫刑部尚書應大猷誥

嘉靖三十五年

尚書職列惟刑部爲特繁政府憲綱至司寇而極備民命攸係國脈是關必才行之俱優庶職務之有濟法紀所在厥任惟均爾吏部右侍郎應大猷業精經術名起甲科奮戎烈于皖城元兇授首寢攤報於西省直指寒心撫勦苗疆恩威大著監巡滇粵清節愈彰改撫四川復巡東魯靖都蠻之亂挫北寇之鋒王室賴以保全丹誠貫日神京無復紛擾精力回天永念賢勞非卿貳所能酬其烈每懷忠藎豈郎佐可得報其勛茲特進爾階

光祿大夫刑部尚書於戲奉公守法念古訓之具存謹始慎終  
庶官箴之不負尚存愷懋以俟恩封欽哉

光祿大夫刑部尚書致仕應大猷存問敕

隆慶元年五月

朕聞日秩告存王制垂尊養之典寵章備物國家隆特沛之恩  
咨爾光祿大夫刑部尚書應大猷業精經術身起甲科正色立  
朝屏毫芒之纖惡哀矜折獄用糾虔夫天刑舊德前功宏茲冊  
府今特遣行人到家詢存用期綠野堂開共朋儔而遊衍黃髮  
詩就俾保乂而熾昌服茲寵錫永慰期頤

又

萬曆七年正月十五日

愷史乞言望隆三老獻鳩延杖典重五更爾光祿大夫刑部尚

光緒僊居集

卷之一

文外編

制誥

四

書致仕臣應大猷式承王命丕著勲猷澤普遐方羣欣黃眉于  
兒齒春涵海宇時念白髮之華巔茲再遣行人方萬山到家詢  
存甯惟戊吉凝禧仰寵頒之疊降定當甲錄重祚識眷祐乎期  
頤於戲壽考維祺以引以翼

諭祭刑部尚書應大猷文

萬曆九年十二月十六日

皇帝遣中書趙景柱督造原任刑部尚書應大猷塋墓訖復諭  
祭曰惟爾資性端介經學湛深奮起甲科筮官郎署奏戎功於  
藩逆旋勦撫於苗疆歷參政府而巡齊魯迺建勳業而貳天官  
忠藎可嘉總理秋卿之職憲綱獨整不替司寇之權恬退是甘  
物望攸屬名齊山斗年屆期頤奈時至令終爾堪無憾而人亡

念舊朕獨慘傷爰示恤典特頒御祭爾靈不昧尚克欽承

左都御史吳時來贈謚誥

萬曆十八年七月初十日

簡任忠賢董司風紀若宣猷秉憲聲華旣懋於朝端則褒德勸功報禮宜隆於身後爾都察院左都御史吳時來性質直亮才識通明自筮仕理官擢居諫職抗章請劍危言偶觸於雷霆去國投荒正氣猶光於日月比奉賜環之詔洊膺專席之司雖直道難容而公評允屬朕采之輿望畀以華階超躋九列之班歷踐貳卿之秩遂登憲府俾總臺綱力挽頽風官方由之振束堅持正論國是賴以匡維方藉表儀遽聞捐逝睠忠勞之未泯想風采之如存是用加贈太子少保謚忠恪錫之誥命於戲青宮

光緒僊居集

卷之一

文外編

制誥

四

晉秩三師兼八座之榮袞字垂袞百世作九原之賁明靈不昧  
渙渥其承

諭祭左都御史吳時來文

惟卿竭忠抗節望著先朝秉憲宣猷名高當代老成既謝窀穸  
倏臨睠念往勞再頒祭典爾靈不昧尚克欽承



文外編二 書啟

宋

與吳察院芾

王十朋

字龜齡  
樂清人

伏審光膺宸命榮陟霜臺朝登正人中外胥慶拜違台範垂三  
十年雖修敬有稽而仰德不替比聞召還成不寐之喜然君子  
未來而小人已去道出婺女日伺騎音竟不瞻際悵望何已某  
蒙恩補外需次還鄉方幸息肩官司來督赴任雖貧居急祿而  
多病未能遽行遙望門牆倍增依慕

通吳給事啟

樓

鑰

字大防  
鄞縣人

甘泉宿望久懷晞驥之誠別乘贅員喜有登龍之便敢修柔削

光緒僊居集

卷之一

文外編

書啟

五

以代先游恭惟

某官

命世偉人爽邦哲匠才雄萬夫而持之以

正名滿四海而取之甚廉出入兩朝周旋三紀選部賴典銓之  
鑿瑣闡高批敕之風劇寄屢分外庸尤著侯邦訟理民舉安於  
田里之間帥閫令行人自得於湖山之外埽蠹源而略盡清狡  
穴以一空不惟所去以見思抑使所居之官大乃守東山之志  
屢廣彭澤之辭均逸祠庭猶俾斯人之有望告歸神武直將與  
世以相忘容與千巖之中傲睨羣物之表凡烟霞勝絕之地皆  
杖履經行之區下流水而上青山固知自適身赤城而名絳闕  
豈得長閒況資元老之壯猶將任舊人而共政丘壑臯夔衣冠  
巢許民具爾瞻股肱蕭曹腹心良平公其毋遜鑰晚生無似薄

宦徒勞涉筆金科倏更三歲兼官玉牒弗措一辭惟父母之年  
益高念菽水之養多闕偶逢新制適契初心得請治中將遂迎  
親之樂強顏員外未知貳郡之方幸門牆之是依信典刑之斯  
在使獲附聲光之末如見古人倘粗傳土苴之餘願爲弟子炎  
威方熾仙隱獨清顧茵鼎之茂調爲宗祊而自重

代回仙居楊縣丞啟

陳耆卿

字壽老  
臨海人

早同州里僅聞關西夫子之名晚並官僚始讀藍田縣丞之記  
拂塵埃於坐席洗忡懣於襟懷伏維知丞朝議渠獲德仁箕裘  
忠孝功名外鑠俗眼自有疾徐道義中函吾心初無愠喜何其  
處也止或尼之自一拾於藍袍凡兩參於油幕屬更化瑟俛佐  
鳴絃非惟見難進易退之風抑亦是小屈大伸之理某浪言采  
藻未遂及瓜見鄉人如空谷之足音瞻從者若旱笛之甘雨緘  
題首及已得君於眉目之間臭味倘投幸索我於形骸之外

光緒僊居集

卷之一

文外編 書啟

六

明

答黃宗賢應原忠論去私存理書

辛未年

王守仁

字伯安  
餘姚人

昨晚言似太多然遇二君亦不得不多耳其間以造詣未熟言之未瑩則有之然自是吾儕一段切實功夫思之未合請勿輕放過當有豁然處也聖人之心纖翳自無所容自不須磨刮得若常人之心如斑垢駁雜之鏡須痛加刮磨一番盡去其駁蝕然後纖塵畢見纔拂便去亦自不甚費力到此已是識得仁體矣若駁雜未去其間固自有一點明處塵埃之落固亦見得亦纔拂便去至於堆積於駁蝕之上終弗之能見也此學利困勉之所由異幸弗以爲煩難而疑之也凡人情好易而惡難其間

光緒僊居集

卷之一

文外編 書啟

七

亦自私意氣習纏蔽在識破後自然不見其難矣古之人至有出萬死而樂爲之者亦見得此耳向時未見得向裏意思此功夫自無可講處今已見得此一層卻恐好易惡難流人禪釋也昨論儒釋之異明道所謂敬以直內則有之義以方外則未畢竟連敬以直內亦不是者已說到八九分矣

答應容菴五首

金賁亨

字汝白  
臨海人

來諭謂喜怒哀樂未發卽其一念方萌未見於外有無之間者是已蓋吾子以戒懼卽慎獨作一事看故以未發之中遷就如此稽諸濂洛遺旨似未脗合恐更宜體玩也濂溪先生云寂然不動者誠也感而遂通者神也動而未形有無之間者幾也誠

神幾曰聖人夫寂然不動者聖人之靜也卽中庸未發之中也或而遂通者聖人之動也卽中庸發而中節之和也聖人之幾卽中庸發與未發之間所謂獨也今吾子以其論幾者加諸未發之中此不肖所未喻也夫未發之中未易言也程門以是一語爲相傳指訣其言曰喜怒哀樂既發則倚於一偏而非中也故未發謂之中吾子乃謂一念方萌未見於外不知所謂一念者喜耶哀耶怒耶樂耶有一偏則非中矣惡得謂之未發也哉龜山云道心之微驗之於喜怒哀樂未發之際則其義自見非言說所及也豫章亦令學者靜中看喜怒哀樂未發時作何氣象延平論肫肫其仁三句云就喜怒哀樂未發處存養至見此

氣象儘有地位也其所授較若畫一不肖初猶疑程氏獨取未發之中而不及中節之和及觀其言有云存養久則喜怒哀樂發自中節則知所謂存養者養此未發之中也蓋中立而和出焉體用一源者也因悟聖人所以感而遂通者以有寂然不動者爲之地也故其幾發而純感通而妙善學者可以類觀而自得矣中庸首章旣云戒慎不睹恐懼不聞又云莫見乎隱莫顯乎微其末章旣云內省不疚無惡於志又云不動而敬不言而信若只一事何四言之未有如此之費詞者且前言不睹不聞後言不言不動前言莫見莫顯後言亦孔之昭詞意亦各相類也可謂一事乎哉程子云養之須直不愧屋漏與慎獨觀一與

字其爲二事可知其門人亦云不愧屋漏與慎獨不同可謂至明白矣夫戒慎於所睹人所能也不睹則難能矣恐懼於所聞人所能也不聞則難能矣蓋涵養本原之功不可一息間斷若慎獨則事感而念生從其幾而用力焉蓋有時也竊謂戒懼本慎獨其功尤難其事尤要故程子云修此道者戒慎其所不睹恐懼其所不聞而已由是而不息焉則上天之載無聲無臭可以馴至也今之學者動多而靜少雖默坐深室妄念橫生當靜不靜此不可以幾言也惟能以敬爲主久則漸消消一分妄念則長一分天理故今之學患不能靜不患其入於禪也程子云雖耳無聞目無見然見聞之理存始得又云靜中須有物此吾

光緒僊居集

卷之一

文外編 書啟

九

儒所謂靜也如何有疑萬萬示教

又

三承手教知惓惓此理蓋勤於求進衰年所難雖鄙見稍有異同然每觀輒喜僕數年來頗愛靜坐竊欲涵養已物庶幾老而無慚非敢效釋家之空寂也其不甚得力只緣工夫作輟豈塗轍差謬也哉周子誠神幾固語聖人事矣他章又以誠幾德兼賢聖而言蓋賢人與聖人只在安勉之間耳用工地頭更不異也明道語上蔡云賢輩在此只是學某言語故其學心口不相應蓋若行之及請問則云且靜坐伊川每見人靜坐便嘆其善學未知其靜也爲察念慮邪正乎抑亦默養本原使私邪無自

入乎夫易之道不專一不直遂不翕聚不發散故天有旦夜聖有寂感何吾心獨有動無靜乎學者雖少惡念而妄念未除當靜不靜不可一槩作幾看也夫幾卽獨也一念旣萌便屬動邊一路不可謂之靜矣若平時無存誠之功只以慎獨爲聖門第一義則以何者爲靜時工夫乎或問程子曰未發之前下動字下靜字曰謂之靜則可然靜中須有物或問當中之時耳無聞目無見否曰雖無聞見然見聞之理在始得觀此則吾儒所謂靜與佛氏自別今謂靜之入禪卻以動爲主何由廓然大公而馴至夫寂然不動地位耶中庸首章從性道說來故先戒懼而後言慎獨戒懼者如樹五穀而深培其根也慎獨者如分別苗

光緒僊居集

卷之一

文外編 書啟

十

莠而去彼取此也其末章先慎獨者承下學爲己之功而爲言也語脈相承不得不爾非截然分先後者此兩章尤中庸切要聖學正途萬望澄心體認生非敢執迷而求勝也緋袍之惠敬服雅情

又

昨承教言倉皇避寇之餘從容談學如此信乎老而不忘也喜慰喜慰只前固當存存一語突入容菴夢寐便是濂洛路頭此精誠所致天啟吾子之衷非竹江果有知於冥冥而云云也存存卽是未發工夫卽是敬而無失明道先生云敬而無失便是喜怒哀樂未發謂之中也敬不可謂之中但敬而無失卽所以

中也存存之久妄念自消理欲易明亦所以爲慎獨之地也此雖動靜二事實則一貫萬勿再疑試將存存工夫朝夕弗懈有所感則研理欲之幾必更得力耳存存不惟養德精神亦收斂在內身亦隨以康也細玩戒慎恐懼四字卽易所謂惕若所謂懼以終始兢兢舜業業曾子戰戰如臨深履薄皆是敬而無失之意若泥其辭則是大聖大賢終日震恐無一時安樂矣孟子所謂不以辭害意正如此如何有得更望示教

又

來諭謂未發之說正程子入夷之嘆夫未發之說明道闡明中庸微旨以開示來學非不肖敢杜撰以自誤而誤人也明道之

光緒僊居集

卷之一

文外編 書啟

十一

言也龜山傳授之指訣也夫本原之地靜觀而驗之主敬以養之久久則虛靈之體可見賦畀之初可復幾發而易研物來而順應爲學要訣似無踰於此矣此正孔門一以貫之之旨也豫章延平畫一相授久而彌光惡得以未發之前捉風捕影無一標的也哉來諭又云聖人教人只從幾上下手此語欲以矯禪之偏而亦未免墮於一偏也晦翁晚歲有悟於程氏之言亦云程子言存養於未發之前則可求中於未發之前則不可然則未發之前固有平日存養之功矣不必須待已發然後用功也濂溪蓋嘗論幾矣其於聖人事則曰動而未形有無之間然必先之以寂然不動焉兼論賢人則曰幾善惡亦必先之以誠無

爲焉其不動其無爲非所謂未發者耶夫幾動而未形不可以言靜也發而不著不可言未發也感物而後生非無時而恆動者也若無時恆動當靜不靜則爲妄念而非幾矣若認妄念爲幾則愈研愈生何時休息無惑乎不知有靜中之功也不肖患不能默識靜存以企聖賢之萬一不患入於夷也夫儒與佛似同而實異儒之靜也基其動也內外合一者也故易曰成性存存道義之門佛氏之靜也滅其動也內外不合者也故明道云釋氏苦根塵者皆是自私者也蓋其靜似與吾儒同而其所以靜實與吾儒異正所謂彌近理大亂真差毫釐謬千里者不可不深辨也若儒者道止於研幾釋氏偏於空寂一動一靜判若

光緒僊居集

卷之一

文外編 書啟

十二

黑白又何疑似之難辨而費昔賢之頰舌也哉更望究心濂洛毋執意見他日當豁然也老年學力可復差馳顛望顛望

又

小兒相家報至備誦款厚誨引至情深佩雅誼且述教言以體認未發之中是徑造正心失卻誠意則涉於空虛矣既而使者持尊翰至復爾云云蓋緣不肖昔陳鄙見未甚分明致相枘鑿如此抱愧抱愧竊詳程門本旨乃爲初學入門者言非徑語正心事也大學八條目必先格物致知學者入門必自格致始格致之功必自本原始故其相傳指訣獨取未發之中其曰體認曰靜觀曰看曰驗乃是默識本原之功格物致知之要道也蓋



天下之理一本萬殊者也一本者其體也萬殊者其用也一本在人則爲未發之中性命之真也體之靜也萬殊在人則爲已發之和情之各當者也用之動也斯理也惟聖人生而知之聖人以下則必格物而始知耳格物之道必先本原欲格本原非講論考求之可得也必須靜坐中體驗認取性命之真靜觀之久妄念漸消氣象乃見非一二之可得也由是日用間理會底道理方有湊泊處故明道先生教上蔡以靜坐伊川先生嘆靜坐爲善學蓋爲此也至晦翁補傳乃以格物爲窮天下萬物之理遂使人馳心於外失卻默識本原一段工夫急於用而遺其體是以有晚年之悔而自歎其支離也其議龜山下梢入禪學

無乃其支離時乎明道有云外面事不患不知只患不見自己又云學者須先識仁識得此理以誠敬存之而已蓋體認未發之中乃識仁也仁己物也非可求之外也於此見得分明方有地可著存養工夫故又云學在知其所有又養其所有又云敬而無失便是喜怒哀樂未發謂之中也敬不可謂之中但敬而無失卽所以中也此養之之事也乃可以正心言也龜山諸賢正是推明知其所有之功以爲養之地非相悖也明道嘗以道南許龜山伊川嘆學者化夷惟楊謝長進今吾子不信二先生面相稱許之言而獨取晦翁支離時未定之語可乎哉象山先生云此理與溺於利欲之人言猶易與溺於意見之人言卻

難吾容菴無乃溺於意見矣乎屢陳鄙言甚覺覲縷特在知己不容不盡所聞以相正耳如何如何

與應容菴

張時徹

日者遠辱賜問報謝不莊滇中人來得稔起居爲慰僕行於四方不少矣雖土俗民風所在殊尙而奸法廢政未有若庸蜀之甚者宣洩調劑如理久病之人緩之不治急之有傷早作夜思亦云竭狗馬之力而尚未有濟也奈之何哉滇南亦稱要荒以夷治者半以華治者半在明公之長材遠略計不動聲色而厝諸衽席之安僕竊願有式焉心親跡遠咨邁未涯因便復爾問訊伏惟原諒不宣

光緒僊居集

卷之一

文外編 書啟

十四

與李景山參議

趙大佑

字世肩  
太平人

歲底新建典史晏爵來承兄惠問遠及先是聞簡擢東藩殊爲斯文公道稱慶不獨區區鄉水私昵也度報至則車從已離南浦準擬東入之便庶得致意而惠問適來兩地同情獨愧兄先施耳且感且謝所示熊氏事曩已耳熟南浦諸公在京師者率以聲應曉曉於其間獨宗伯筠老稔知風裁每一談及輒面發赤云李景山嘗生事者惟北原公不幸無好子孫眾口稍然道旁輿論則無不左袒於兄者昨見五臺道長一扣之則乃對眾昌言又爲兄樹一赤幟矣新舊歲中筠翁於兄心力俱勤昔樂子從政孟氏爲之忘寐由今觀之千古同情夫其目前作用能

使君子得恃以無懼他時相道不占有孚某於斯文公道重有慶焉代巡裴道長忝與雅好今承使問還報卽當爲兄先容之此君端確可共事必能與兄同心責寅全山先生亦然值其行便草次附申諸惟情亮不一

再簡吳悟齋掌科

趙大佑

昨承使書涉遠言別故人通顯猶眷戀於衰遲盛德可知矣感謝感謝部檄如至榮行似不可緩先皇帝敬天勤民美意恆存宵旰祇緣意屬稍偏竟使功不遂志吾黨罪過可盡歸於上耶所幸今上踐祚已富春秋朝政更新多出睿算明作之際所謂匡救彌縫者在諸公固宜效忠在聖躬亦宜盡孝公行當盛世宜得昌言斟酌舉止切須慎重勿傷過激是祝易曰革而當其悔乃亡虎豹之變其文炳蔚不亦宜乎祖道無由專馳小僕代問行李管窺蠡測恃有道僭附云云驚足嘶風徒增俗哂

與吳悟齋節推

徐階

得前月十二日華劄知賊勢益猖獗殊切憂念曩者屢奉書固嘗慮及此不知當事諸公何以不豫爲之備深謀忽而不聽誑言則唯唯從之如謂賊易蕩平又謂鄉兵可用不必更調客兵之類是也所爲如此何以望有功哉聞川湖之兵雲集此固可喜但兵聚既眾倘駕馭無術布置無方調護不周供餉不繼則不惟不能殺賊恐有搶殺忿爭之禍作焉此事於地方關繫甚

重不知當事諸公又何以處之也十月間曾寄軍門一書茲錄  
奏請教如觀所雙江二公語及可與觀之

復吳悟齋操江

海瑞

承教累數百言莫非相愛至意我輩相與如是然後可稱三益  
而不入於損也感荷銘心可時日盡耶其中有不敵面以爲是  
者過客一節也孟子謂我欲行禮子敖以我爲簡今人居官舍  
職分事日逐奔走於外祖制不出郭迎送乃過客又出之耶事  
有司存不必身親奔候然後謂之不忘賓旅也水路去有餘裕  
矣陸路夫馬張董翁見教區區及之生亦疑人品不同若用少  
則今數有餘若用多者則今數誠不足非如水路一船而載可

光緒僊居集

卷之一

文外編 書啟

十六

一定也兄未言及不知今數尚可少增否乎小東說及存翁生  
無此意人言之訛勿聽之可也此處錢糧棼如亂絲今似稍有  
頭緒如田賦則尚未得彼所以爲之之端倪也鄙意必欲行之  
兄前札未及下手工夫今有以教我乎日不暇給諸凡俱未能  
做成片段可恨忙中尊差回謹此復惟少進切望

與吳悟齋操臺

太平府人 周怡 字順之

竊惟任天下之事在勇通天下之變在識運識與勇在才僕粗  
狂之勇敢擬竊比而識疏才拙遠不能企門下此冒險雖同而  
格迥別昨見論無恥憲臣一疏但見題語未覩全文只此四字  
已足立天下之大防寒奸諛之諂骨今此之世乃有四維不張

之徒當國者未免過於包荒遂致人無忌憚不有柱石其何能  
國敬羨敬羨僕待罪東方夙夜黽勉期少有省惕即可引退決  
不久迷進止爲知厚羞門下京兆之選未見推賢方洲公深爲  
未滿雖然舒徐容與俟時觀成未必非賢吾輩未免望治之速  
疾惡已甚惟高明裁之如何

國朝

懇釋回難民子女啟

康熙十四年二月

鄭錄勲

邑令

竊惟仙居自上年六月二十八日金處逆寇李雲等統領賊衆臨城時蒙各憲委汪都司國祥領兵救援卑職從內夾擊活擒渠魁斬獲賊衆無數卑職竊謂賴社稷之靈滅此朝食度幾城池永無恙也詎料八九月間復遭溫黃海賊林衝朱福連必中等潛越茅坪嘯聚縣南朱溪一帶地方雖屢被卑職統兵擊敗柰賊恨益深東勾西引勢極滋蔓希圖攻襲復仇卑職深慮城孤兵寡請發京口官兵援防協同撲勦堅守至十月十三日奉都統令牌撤去援防官兵十四日又復撤卑職與城守官兵民

光緒僊居集

卷之一

文外編 書啟

十八

心徬徨擁道攀轅哭留鎮守此時官民睽戀之情真不堪述者但卑職遵奉檄調不得不堅忍拋棄耳以致滿城士女逃散一空賊遂虛踞城後蒙 貝子殿下暨各憲仍著卑職領兵恢復卑職到天台之時卽差的役到縣探聽據云遍地是賊劫掠百姓男婦俱遭荼毒無處安身多被驅脅搬入縣城斯時卑職卽密遣牌一面潛行知會百姓凡在大路城中居住者卽速搬移恐大兵按臨殃及無辜不意死賊狼心一婦不許出城及卑職與同滿漢官兵至二月初一日辰時尅復城池攻敗之餘賊雜民處黑白難辨橫罹鋒鏑者不知凡幾更有慘者妻孥子女繫累歸營所有子遺難民哭泣號訴動地震天卑職伏思大兵到

城百姓不能開門迎接法亦應爾但朱連二賊既已強勁海賊  
曾養性復遣僞總兵蔡玉樹領賊二千協守各門填石城上圈  
圍並不用一百姓至街坊巷口分布賊眾防備百姓卽欲開門  
無從措手且賊首聲稱百姓俱通我兵希圖內應是百姓與賊  
原自攜貳也痛念薰蕕不一玉石宜分況民爲邦本官軍勦逆  
無非救民水火若使骨肉離散亦何樂其有生且伏讀頒行  
聖諭賊眾踞城原無攜帶妻子凡被擄子女應與發還之天  
語卑職竊思前既拋棄百姓今又慘傷殘黎此實卑職負民非  
民負卑職也且前拋棄殘黎固是卑職負民但卑職與防官奉  
各都統撤回則負民之故又不獨在卑職一人矣卑職官卑職

光緒僊居集

卷之一

文外編

書啟

十九

微空抱心傷徒懷膚切伏乞 貝子殿下網開三面救此一方  
凡被擄子女盡數飭查給還庶難民無隱不聞而卑職亦有民  
可治也

康熙十四年二月初二日具啟并稟台道府隨於二月  
初五日蒙分巡道楊諱應魁轉啟爲照我  
國家例凡有賊踞城池能預爲投降者免其誅戮如有  
拒敵者一槩不留此律例然也但查仙居之失原係奉  
各副都統之文將兵馬撤回致賊得乘虛入踞誠如該  
縣所請官負于民非負於官也今城中之人不能縛  
賊以順論其路似爲可恨原其情實有可矜自今  
貝子殿下從當陣擒來之真賊僞將尚概行寬宥而况  
仙子女原係我  
皇赤子殿下必有惻然不忍者且奉有凡百姓被  
擄妻孥應與發還之旨若不從此大開一面恐自茲  
進取不能鼓向順之念伏乞 殿下於萬不可寬之  
中稍寬一線發還被擄子女使得團聚則萬姓歡呼而  
取温處閩中必勢如破竹等因奉

甯海將軍固山貝子諭該據道啟稱難民慘傷情到  
府照得逆賊竊踞仙城負固堅守百姓不能強賊迎降  
豈屬得已及大兵剋城皂白不分慨行誅戮以家口搶  
掠按法固所難宥而原其初實有可憫本府軫念仙  
民因我兵撤回被賊迫脅原非甘心從賊與他城失陷  
不同何忍令其妻孥拆離該道有地方之責即諭知縣  
鄭錄勳查明婦女果有本夫及至親願領者該縣稟明  
都統卽許准贖爲此特諭又奉批據該縣啟稱民稟  
難分厄遭殺戮妻孥子女繫累歸營慘傷等情本府深  
爲憫惻原其被賊迫脅實出不得已業諭台州道府照  
酌贖仰該縣卽遵行繳

亟請添兵防禦并陳進勦機宜密啟

鄭錄勳

康熙十四年五月十七日仙居團練守備夏應宿報稱  
據差兵捕偵探得本月十五日六日有長髮賊四五十人  
在于本汛雙廟之東地名護聖寺等處出沒伺等語  
到職除加意巡防外理合稟報同日又台協左營駐防  
仙居汪都司隊兵趙有亮等稟稱台州府三江口左近  
白馬山邊對岸梅浦一帶俱新築土牆安設大炮專打  
府城過往的人意在斷絕這條路徑各到縣據此

光緒僊居集

卷之一

文外編 書啟

二十

竊惟當今逆賊竊踞温黃倚險負固抗拒天兵蓋無刻不思侵  
犯我城邑蹂躪我人民凡爲臣子所當誓不與俱生必期滅此  
而後朝食者也伏念仙疆新復之後被傷遺黎驚鴻未定田地  
盡皆荒蕪兼以官兵不滿七百城守單弱可虞各鄉團練皆非  
慣戰之卒又無官給衣糧以之供驅策夾助則有餘以之當捍  
禦折衝則不足今據團練汛防各稟賊萌漸露若不添兵防禦  
誠恐覆轍相尋末職微員之身命亦何足恤第仙邑實乃台郡  
之屏翼西北可以接金處東南可以控温黃爲戰守必爭之地  
務須先事綢繆庶得有備無患且查仙邑要隘莫如白水垵夏



閣雙廟橋頭四處每處若得官兵五百名駐防則逆賊無由竄迹民心得以帖然由今及時耕種俾糧餉有出是一舉而三善備焉且各鄉之壯有力者藉官兵之威勢無所顧畏相與聚集訓練數月之後自增敢勇之士數倍矣夫然後由白水垵夏閣而進可取尤鳩張家渡等處由雙廟而進可取茅坪廟寮等處由橋頭而進可取道赭黃山等處我所進之處多則賊勢分而不能備我養銳之兵多則就近乘隙見可而進出其不意而賊不及備恢勦機宜莫有善于此者至於總統節制使與地方相安無擾應聽殿下幃籌睿慮區畫萬全非末職微員所敢擅議也

